

■ TRIBUNA POLITICA

La «Graduate School» sco lieu da perscrutaziun

DA MARTIN JÄGER

Il Grischun vala sco pajais da las 150 vals. Nossa cuntrada muntagnarda cun ses pizs, sias stretgas, ses pass e ses cunfins climatics, nossa biodiversitad, la diversitad culturala e linguistica – tut quai è ina funtauna grondiusa da l'inspiraziun. Quest ambient singular ha er pussibilità la fundaziun da differentas instituziuns da perscrutaziun da la medischna, da la tecnica sco er da las ciencias natiralas, umanas e socialas. Per che la lavur da perscrutaziun da questas instituziuns possia dentant cuntanscher ed influenzer cun success ils standards da prestaziun necessaris da l'auta perscrutaziun naziunala ed internaziunala ston esser ademplidas almain duas cundiziuns.

Primo: Bleras perscrutadras e blers perscrutaders che lavuran sco doctorandas u doctorands u sco manadras u manaders da perscrutaziun en il Grischun dovran gist quest ambient pretensius, quests conturns interessants, per satisfar a las autas pretensiuns, demussond prontezza da furnir prestaziuns.

Secundo: Per che las ulteriuras specialistas ed ils ulteriurs specialistes prendian commensuradamain notizia dals resultats da las perscrutadras e dals perscrutaders grischuns sto lur lavur vegnir colliada cun las facultads universitaras ed uschia esser integrada stretgamain en la rait da perscrutaziun naziunala ed internaziunala.

Tuttina: Er sche tuttas duas cundiziuns



numnadas èn ademplidas exista il privel che las prestaziuns dal Grischun sco regiun da perscrutaziun n'èn betg visiblas e vegnan resguardadas meina pauc sco totalitad. Qua pon ins forsa far la cumparegliaziun cun l'aparientscha da numerus edificis istorics grischuns che han vers anora ina cumparsa simpla e grischua e che mussan lur vaira qualitad pir sch'ins entra en quests edificis.

La funcziun indispensabla da render enconuscent ed accessibel il sector da perscrutaziun a la publicitad ed a las universitads naziunals ed internaziunals duai ussa vegnir surpigliada da nov da la «Graduate School» dal Grischun, che vegn actualmain installada da l'Academia raetica en stretga collavuraziun cun l'Universitad da Turitg e cun la Scola politecnica federala da Turitg. La Graduate School dal Grischun vegn a facilitar a las perscrutadras ed als perscrutaders sco er a las manadras ed als manaders da perscrutaziun en noss chantun da lavurar cun success sin in aut nivel scientific. Per quest intent vegnan focussadas las fur-

maziuns supplementaras specificas e complementaras, coordinadas occurrenz e projects dals singuls champs da perscrutaziun ed organisadas occurrenz per furmar raits da perscrutaziun entaifer il Grischun.

Impurtantas èn er scuntradas regularas per tgiar il barat tranter las menturas ed ils menturs da las doctorandas e dals doctorands sco er en general la lavur da publicitad.

Sin plaun svizzer ed internaziunal duai il Grischun vegnir percepi anc pli sapientivamain sco lieu da perscrutaziun e da scolas autas. Per il chantun, che contribuescha sia part a l'installaziun ed a la gestiun da questa nova Graduate School tras ina incarica da prestaziun, vul quai plinavant dir che persunas qualifitgadas da tut il mund che s'interessan per la perscrutaziun daventan anc pli conscientas da las pussaivladads da perscrutaziun ch'èn avant maun en las instituziuns grischunas. In ulteriur avantatg da la Graduate School è quel che noss chantun po far valair meglier sia qualitad sco lieu da perscrutaziun en la concorrenza naziunala per resursas. Las singulas instituziuns da perscrutaziun grischunas pon uschia concentrar anc meglier lur forzas sin lur lavur da perscrutaziun sco tala.

Jau m'allegrel dal schlantsch actual. La Graduate School vegn franc a daventar ina perla dal Grischun sco futura cuntrada da furmaziun e da perscrutaziun.